



別
下
彙
叢
書



(清) 蔣光煦 編

癸亥仲冬上海

涵芬樓影印

別下齋叢書序

道光丁酉春予訪嘉興錢輔宜學博於海昌蔣生沐茂才以所爲篝燈教讀圖徵序予固深有意乎其爲人也已而生沐以所刻別下齋叢書見視屬爲序之且夫六經尙矣而班志兼列九家蓋以九家亦六經之支流餘裔也是故賢人君子之撰著與憔悴專壹之士以偏長自足者其致力雖殊而所冀後人之采而輯之傳諸久遠則其用意未嘗有異叢書之刻其事雖微而與班志之兼列九家爲讀書稽古之助其用意亦未嘗有異近世刻叢書之富者無過新安鮑氏知不足齋今生沐於古人之書網羅放失皆鮑氏之所遺而並世之人有著

述婉美於前賢而未及梓以行世者亦采錄以公諸同
好行見空谷遐心考槃寤歌之徒俯仰古今幸夫偃蹇
寥戾仰屋梁著書者之不終泯滅方將太虛以爲室明
月以爲燭齊千載於旦暮等天涯若比鄰尙何有乎蕭
條寂歷之感恨不獲相與晤言而詠歎也哉宜興吳德
旋序

別下齋藏書記

自古藏書之難繇於聚書之不專聚之不專繇於其心之不好歐陽子云物必聚於所好然好之而無其力與有力而不好之篤皆不能以聚其不好亦繇於人之不知讀甚矣聚而能藏之之爲難也宋元以前無論已明代所偶藏書者有鄞范氏天一閣西亭宗正聚樂堂晉江黃氏千頃堂崑山葉氏棗竹堂山陰祁氏澹生堂秀水項氏天籟閣常熟毛氏汲古閣

國朝有秀水曹氏靜惕堂朱氏暴書亭長洲徐氏傳是樓濟南王氏池北書庫其最著者雖卷帙之多寡不同要皆以人重其所藏而天一閣歸然尙存其詔後人葆

守之瀟至善也今海昌蔣君生沐少失怙性耆古好讀書自十齡卽喜購書迄今十餘年積有五萬卷竝有宋元舊槧舊精鈔本并世所希觀者君旣以所藏若干種付剞劂爲宜年堂叢刻行世昔朱竹垞太史有書八萬卷自云亦足以豪君今好之旣篤則歲增月益其儲藏正未可量豈僅八萬卷而已使好之之心不專好之而不能有力亦安得卽籤帙之富如是邪齋曰別下者孔子言困學爲學知之次君能讀其書已無媿於學知而猶以別下爲名其亦自抑而自厲之者歟

道光二十一年歲在辛丑立冬後一日嘉興李富孫拜
撰時年七十有八

別下齋叢書目

丙辰年重編

龍氏易傳

詩氏族考

春秋三傳異文釋

靖海紀畧

箕田考

(山陰) 硤石山水志

漢魏六朝墓銘纂例

西洋朝貢典錄

拜經樓題跋記

石藥爾雅

德星堂家訂

文泉子集

得全居士詞

澹庵長短句

燕喜詞

茗齋詩餘

甌香館集

瓊花集

七頌堂詞繹

金粟詞話

古文緒論

初月樓論書隨筆

山靜居詩話

曝書雜記

小蓬海遺稿

附屑屑集

江山風月譜

附有聲畫

詩辨說

卷之三

龍氏易傳

晉
王
羲
之

欽定四庫全書提要

周易集傳八卷

元龍仁夫撰仁夫字觀復廬陵人吉安府志作永新人官湖廣儒學提舉事蹟附載元史儒學傳劉詵傳內是書成於至治辛酉董真卿周易會通稱其有自序一篇此本無之朱彝尊經義考於舊序例皆全錄而亦無是篇則其佚已久矣吉安府志云仁夫周易集傳十八卷立說主本義每卦爻下各分變象辭占今觀所注雖根據程朱者多而意在卽象詁義於卦象爻象互觀析觀反覆推闡頗能抒所心得非如胡炳文

等徒墨守舊文者也吉安府志又稱其謂雜卦爲占筮書引春秋傳屯固比入坤安震殺皆以一字斷卦義爲證其說似創而有本亦異乎游談無根者元史稱仁夫所著周易多發前儒之所未發殆不誣矣原書十八卷今僅存八卷然上下經皆已全具朱彝尊曝書亭集有是書跋謂通志堂刻經解時以其殘闕故未開雕云云夫傳錄古書當問其義理之是非不當論其篇頁之殘闕殘篇斷簡古人尙且蒐輯仁夫是書上下經哀然俱完而以不全棄之何其慎也況傳寅禹貢說斷程大昌禹貢圖說林之奇三山

書傳今以永樂大典校之皆非完帙而徐氏仍
登梨棗是又何說歟今特錄存之俾重著於世
庶於經義有所裨焉

周易集傳卷第一

元廬陵 龍仁夫 學

新安胡一桂曰上經十八卦反對成三十四卦上經五十二陽爻五十六陰爻下經五十六陽爻五十二陰爻

三三乾上乾下

乾元亨利貞

貞有二義曰正曰固先儒并取二字釋之

如貞吉永貞艱貞貞安貞微異而實同如貞凶貞厲貞吝則不宜主固耳至可貞不可貞勿用永貞義尤明孔子作傳憂後人以易占險故彖象傳凡釋貞必曰正與經文訓固不相妨况文言貞固足以幹事可謂一言蔽之今審定凡經文言貞並

初九潛龍勿用

荀說卦乾為龍六陽變化故取以象焉

爾无別義○六陽全體龍也爻居最下潛地之龍也若有德者當之但可靜晦涵養需時而動稍見鋒穎